

INUIT ATAQATIGIIT

Inatsisartuni

18. juli 2019



UKA2019/139

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Peqqinnissaqarfiup aqunneqarnera, aaqqissuussaana kiisalu peqqinnissamut tunngasutigut sullissisut aamma tarnip pissusaanik ilisimasallit pillugit Inatsisartut inatsisaanni nr. 27, 18. november 2010-meersumi § 3, imm. 2 naapertorlugu nalunaarusiornissamik Naalakkersuisut peqquneqarnissaannik Inatsisartut aalajangiiffigisassaattut siunnersuut. Nalunaarutip minnerpaamik imarissavai atorfiup illersugaanera aammalu katsorsartittut pisinnaatitaaffii pillugit aalajangersakkat. Soqutigisaqartut attuumassuteqartut nalunaarutip imarisassaanik suliaqarnermi akuutinneqassaput.

(Inatsisartunut Ilaasortaq Aqqa Samuelsen, Inuit Ataqatigiit)

Tunngavilersuut:

Nunatsinni innuttaasut ataatsimut isigalugit tarnikkut peqqissumik inuuneqarnissaat Inuit Ataqatigiit pingaartippaat. Taamaattumik pingaaruteqarpoq Nunatsinni isumaginninnikkut suliaasaqarfiit unammilligassallu suugaluartut tamaasa pitsaanerpaamik ileqqorissaarnermullu malitassanik pitsaasunik siunertaqartunik aaqqissuunneqartariaqarput.

Innuttaasut sanngiinnerusumik inissittartut pitsaanerusumik atugaqarnissaat anguniarlugu, innuttaasut tarnikkut atugarissaarnissaannut siunissamut ungasinnerusumut isigaluni toqqammaviliisussamik tarnip pissusaanik ilisimasallit pillugit nalunaarummik peqarlernissarput pinngitsoorneqarsinnaanngilaq.

Nalunaarut minnerpaamik atorfiup illersugaanera aammalu katsorsartittut pisinnaatitaaffii pillugit imaqassaaq¹.

Atorfiup illersugaanerata qulakkiissavaa nunatsinni tarnip pissusaat pillugit ilisimasallit kisimik tarnip pissusaat pillugit ilisimasallit atorlugit katsorsaaneq suliarissagaat. Atorfiup illersugaanera "*naleqquttumik ilinniagaqarsimanissamik qulakkeerinnittussa, katsorsaanermit nakkutilliinermullu tunngatillugu*

*pisussaaffinnik malittarisassiuisusaaq kiisalu pineqaatissiinissamut
pisinnaatitaaffik, atuutilersinneqarsinnaavoq.” ii*

Katsorsartittut pisinnaatitaaffii aamma nukittorsariaqarput. Maanna inatsit atuuttoq malillugu Nunatsinni Nakorsaaneqarfik peqqinnissaqarfiup iluani, pisortat oqartussaasuini tarnip pissusaanik ilisimasallit sulineranut nakkutilliisusaaatitaavoq. (Peqqinnissaqarfiup aqunneqarnera, aqqissuussaanaera kiisalu peqqinnissamut tunngasutigut sullissisut aamma tarnip pissusaanik ilisimasallit pillugit Inatsisartut inatsisaat nr. 27, 18. november 2010-meersoq). Namminersortunilu ilinniakkaminnut tunngasutigut sulinerat pillugu aamma nakkutigineqartarluni. Taamaaliornikkut namminersortuni katsorsartittut sullinneqarneranni tarnip pissusaanik ilisimasallit sullitaminnut sapangiinnissaat qulakkeerneqarluni. Taamaakkaluartorli Naalakkersuisut susasaqartut peqatigalugit katsorsartittut pisinnaatitaaffii qanoq imaqassanersut pisinnaatitsissummik tunniussisimavugut.

Inuit Ataqatigiit suleqataanissamut alloriaqatigiinnissamullu suleqatiserinnikkusussuseqarput. Naalakkersuisoqarfiit pineqartumullu susasaqartut peqatigalugit inatsisiliornermik suliaqarnissamik kissaateqarpugut. Taamattuttaarlu inatsimmi ilanngussat (§4 imm. 1 aamma 2,4 kiisalu 5-6) nalunaarusiamik kissaateqarnitsinni suliaqassappata ammaffigaarput.

Taama oqaaseqarluta siunnersuut Inatsisartunut suliassanngortipparput.

Pisortanut aningaasatigut allaffissornikkullu kingunerisassai:

Nalunaaruisiorneq aamma ilisimasalinnut peqataatitsineq AC-fuldmægtigip ukiumi ataatsimi sulineranik naleqartussatut missingerneqarput, tassa 500.000 kr.-it missaannik. Naalakkersuisut susasaqartunik peqataatsinerminni atorfiup illersugaanera aammalu katsorsartittut pisinnaatitaaffii pillugit qanoq nalunaarummi ilusilernerqarumaarnerat apeqqutaalluni nalunaaruisiornerup aningaasatigut allaffissornikkullu kingunissai ersarinnisulerumaarnerat naatsorsuutigineqarsinnaavoq.

Namminersortunut aningaasaatigut allaffissornikkullu kingunerisassai:

Atorfiup illersungaanerata tarnip pissusaanik ilisimasalittut ilinniarsimangitsut tarnip pissusaanik ilisimasalittut nalunaarutigisarnerat unitsissavaa. Tamatumumali kingunerisassaata annertussusaa nalileruminaappoq.

Innuttaasunut aningaasatigut allaffissornikkullu kingunerisassai: Soqanngilaq.

ⁱ http://inatsisit.gl/Lov?rid=%7b4BA6A48E-B06E-4590-82E0-2057F18D45E3%7d&sc_lang=kl-GL

ⁱⁱ §37 naapertorlugu apeqqummut akissuteqaat 264/2019-imik normuligaasoq.